

永樂北藏

趙樸初題



图书在版编目 (CIP) 数据

永乐北藏/赵朴初名誉主编. -北京: 线装书局, 2000. 2
ISBN 7-80106-052-0

I. 永… I. 赵… II. 大藏经 N. B941

中国版本图书馆 CIP 数据核字 (1999) 第 73752 号

永樂北藏 (二〇〇冊)

出版發行 綫裝書局 (北京朝陽區春秀路太平莊十號)

責任編輯 李立

裝幀設計 顏菲菲

印 刷 中國地質科學院五六二印刷廠

版 次 二〇〇〇年三月第一版第一次印刷

印 數 〇〇一——一〇〇

書 號 ISBN 7-80106-052-0/B·1

定 價 八八〇〇〇 圓

ISBN 7-80106-052-0



9 787801 060525 >

御製

天清地寧
風雨調均
烽警不作
化醇俗厚
外順內安
普際光明
大正統五
年既往未
十來月十
一俱登正
日覺
陰陽和順
百穀常豐
禮教興行
一人皆慈
一統熙皞
九幽六道
萬類咸暢
七政明朗
子孝臣忠
物靡害災
俱登正覺

永樂北藏第一二七冊目錄

○出曜經	二十卷	姚秦竺佛念譯	(廣一—內十)		一
○賢愚因緣經	十三卷	元魏慧覺共威德譯	(本冊卷第一至卷第五)	左一—五)	七一
					一九

出曜經序

廣一

出曜經者婆須密舅法救菩薩之所撰也集比一千章立為三十三品名曰法句錄其本起繫而為釋名曰出曜出曜之言舊名譬喻即十二部經第六部也有罽賓沙門僧伽跋澄以前秦建元十九年陟葱嶺涉流沙不遠萬里來至長安其所聞識富博絕倫先師器之既重其人吐誠亦深數四年中上聞異要奇雜盈耳俄而三秦覆墜避地東周後秦皇初四年還轅伊洛將返舊鄉佇駕京師望路

致慨恨法句之不全出曜之未具緬邈長懷
蘊情盈抱太尉姚旻篤誠深樂聞不俟駕五
年秋請令出之六年春訖澄執梵本佛念宣
譯道疑筆受和碧二師師法括而正之時有
不怙從本而已舊有四卷所益已多得此具
解覽之畫然矣予自武當軒衿華領諮詢觀
化預參檢校聊復序之弘始元年八月十二
日僧叡造首

出曜經卷第一

尊者法救造

姚秦三藏竺佛念譯

無常品第一

昔佛在波羅柰國佛告諸比丘當來之世衆生之類壽八萬四千歲爾時壽八萬四千歲衆生輩於此閻浮利內衆生共居一處穀米豐熟人民熾盛雞狗鳴喚共相聞聲佛告比丘汝等當知爾時人民女年五百歲便外適娶爾時有王名曰壤佉七寶導尊從以法治化

無有阿曲有自然羽葆之車高千肘廣十六肘豎立修治衆寶瓔珞在大衆中分檀布施無悋悔心造立功德爲衆導首與諸沙門婆羅門諸得道者遠行住止經過居宿皆悉給施有所求索無所悋惜爾時衆生壽八萬四千歲有如來出世名曰彌勒至真等正覺明第一行成爲善逝世間解無上士道法御天人師號佛世尊如我今日成無上至真等正覺十號具足常當將護無數百千諸比丘僧如我今日將護無數百千諸比丘僧與諸大衆廣

說深法上中下善義味微妙具足清淨修於
梵行如我今日與諸大眾廣說深法上中下
善義味微妙具足清淨修於梵行廣說如彌
勒下生如佛所說有經名曰六更樂道若有
衆生生其中者若眼見色盡見善色不見惡
色見愛不見非愛見可敬不見非可敬見可
念不見非可念見美色不見非美色諸有衆
生耳聞聲者鼻嗅香舌知味身知細滑意知
法乃至天帝亦復如是爾時世尊遊毗舍離
獼猴池水大講堂上爾時衆多毗舍離諸童

子等各生此念我等宜可共相率合至世尊
所問訊禮覲其中童子或有乘載青馬青蓋
被服皆青或有乘載青黃赤白被服皆白槌
鍾鳴鼓作倡妓樂前後導從至世尊所爾時
世尊告諸比丘汝等當知若有不見諸天遊
觀至後園浴池者今當觀此諸童子等所著
法服乘載輿輦與彼諸天亦無差別所以然
者諸天被服與此無異爾時座上數百千衆
生之類各作是念我等宜可發真誠誓使我
等後生生天上人中恒著此法服永已不離

使當來世有佛興出聞其深法永離苦惱入
泥洹界如來已知衆生心念求生三有不離
苦惱便與大衆而說此偈

所行非常爲磨滅法不可恃怙變易不住
爾時衆生聞此一句偈不可稱計百千衆生
於現法中漏盡意解皆得道果

昔有婆羅門四人皆得神通身能飛行神足
無礙此四梵志自相謂言其有人民以餽饌
食施瞿曇沙門者便得生天不離福堂有聞
法者入解脫門我等今日意貪天福不願解

脫不須聞法是時四人各執四枚甘美石蜜
一人先至如來所奉上世尊如來受已告彼
梵志而說此偈所行非常梵志聞已以手掩
耳次第二人至如來所貢上石蜜如來復說
此偈謂興衰法梵志聞已以手掩耳次第三
人至如來所貢上石蜜如來受已復說此偈
夫生輒死梵志聞已以手掩耳次第四人至
如來所貢上石蜜如來受已復說此偈此滅
爲樂梵志聞已以手掩耳各捨之去如來觀
彼心意念知應得度便以權便隱形不現四

人各聚一處自相謂言我等雖施瞿曇沙門意不決了瞿曇沙門有何言教先問前者奉上石蜜得何言教亦不聞法乎對曰我從如來聞一句義所行非常聞此義已即以手掩耳亦不承受次問第二人至如來所得何言教其人復自陳說廣一吾至如來所貢上石蜜如來與我而說此偈謂興衰法吾聞此已以手掩耳亦不承受次問第三人汝至如來所得何言教其人復自陳說至如來所貢上石蜜如來與我而說此偈夫生輒死吾聞此已以

手掩耳亦不承受次問第四人汝至如來所得何言教其人對曰至如來所貢上石蜜如來與我而說此偈此滅爲樂四人說此偈已心開意解得阿那含道爾時四人自知各得道證還自懇責至如來所頭面禮足在一面立須臾退坐白世尊曰唯願如來聽在道次得爲沙門世尊告曰善來比丘快修梵行爾時四人頭髮自墮身所衣服變爲袈裟衣尋於佛前得羅漢道佛臨欲般泥洹時告大迦葉及阿那律汝等比丘當承受我敬敬事佛語

汝等二人莫取滅度先集契經戒律阿毗曇
及寶雜藏然後當取滅度廣說乃至供養舍
利盡耶旬竟便共普會集此諸經五百羅漢
皆得此解脫捷疾利根衆德備具普集一處
便與阿難廣一敷師子高座勸請阿難五使昇高座
已昇高座便問阿難如來最初何處說法時
阿難便說聞如是一時說此語已時五百羅
漢皆從繩牀上起在地長跪我等躬自見如
來說法今日乃稱聞如是一時普皆舉聲相
對悲泣時大迦葉即告阿難曰從今日始出

法深藏皆稱聞如是勿言見也佛在波羅柰
仙人鹿野苑中爾時世尊告比丘此苦源
本本所未聞本所未見廣說如經本是時衆
人已集契經是時尊者迦葉復問阿難如來
最初何處說戒律時阿難報大迦葉吾從佛
聞如是一時佛在羅閱城伽蘭陀竹園時迦
蘭陀子名曰須陳那出家學道在比丘境最
初犯律至不度法廣說如戒律是時迦葉復
問阿難如來最初何處說阿毗曇阿難曰吾
從佛聞如是一時佛在毗舍離獼猴池側普

集講堂所爾時世尊見拔耆子因緣本末告諸比丘諸無五畏恚恨之心者便不墮惡趣亦復不生入地獄中演說如阿毗曇初夜集阿毗曇竟後夜便說出曜而演此偈睡眠覺寤何以故說睡眠覺寤如世尊等正覺所說夫睡眠者損命愚惑有所傷壞不成果證沒命無救不至明處所以然者如人覺悟便能修德造立善本耽著睡眠便失此法故謂愚惑時座中復有說者如佛所言若有衆生覺寤之中所念衆事於睡眠中憺然無想世尊

告諸比丘寧睡不覺此云何通是故佛說除去睡眠常念覺寤如佛說偈睡眠覺寤宜歡喜思言歡者內心踊躍喜怡歡樂善心生焉是故稱說宜歡喜思聽我所說者專意一心無有亂想意定無誤堪任承受是以故說聽我所說撰記出曜言出曜者過去恒沙諸佛世尊皆共讚嘆出曜法義如來世尊亦名最勝云何爲最勝勝諸結使不善之法勝婬怒癡勝一切生死結縛勝外道異學尼乾子等九十六種術於中特出故曰最勝演說暢達

無有留滯布現演吐爲諸天人義味成就是故說撰記出曜如世尊所說演說暢達無有留滯

如世尊說一切通達仙人慈哀一身無餘如世尊所說者暢達演說言無留滯故曰世尊說也一切通達者一切智達一切示現一切通了分別一切義遊六神通成無上道如來六通亦非羅漢所能及逮佛爲諸度最勝最上於諸法相悉能分別故曰一切通達也仙人慈哀者一切充滿生死希望如父母之

想擁護心慈哀之意諸佛世尊亦言仙人修神足道亦名仙人衆德具足亦名仙人長夜修善亦名仙人是以故說仙人慈哀也一身無餘者所謂身者依四大根本更無復有亦無邊際亦無出生如佛存在躬自演說阿難當知末後境界末後無胎末後所受形分如我阿難更不復見天地方域更受此身此是苦際故曰一身無餘也

所行非常謂興衰法夫生輒死此滅爲樂昔諸梵志各誦師法分爲二部一部所見萬

物皆有一部自稱萬物皆無諸言有者如來分別除去猶豫斷其希望便與演說所行非常諸言有者自有讚頌

以利輪劒 殺害衆生 恒知惠施 無有善惡 亡形不變 身體中間 利劒來往 不傷其命 地大恒在 風界無著 大受苦樂 命根亦爾 正使利劒 通達來往 亦不見有 善惡之報 設害父母 無善惡報 況當餘者 而有其果 猶如以鉗盛雀有人打鉗雀便飛逝傷害衆生命自遠逝無所傷損如來世尊欲去彼邪

見衆生故曰所行非常不可恃怙遷轉不住爲磨滅法命如朝露暫有便滅故曰所行非常一部自稱萬物無者共相慶賀成我等義如來觀彼心中所念而告之曰謂興衰法夫興衰者夫盛有衰合會有離無身則已受身有何可避梵志復作是念設衰耗法更不生者則成我義是故世尊重與說義夫生輒死輪轉不住諸受陰持共相受入慧眼觀察乃能分別猶如日光塵數流馳難可稱計此五盛陰身衆行所逼流轉生受無有懈怠故曰

夫生輒死此滅爲樂者所謂永盡無餘無欲
著意常息安寧最第一樂無生滅想成第一
義無欲樂無爲樂無漏樂盡樂滅樂故曰此
滅爲樂

何喜何笑念常熾然深蔽幽冥如不求錠

佛一

昔佛在舍衛國祇樹給孤獨園食後日晡有
衆比丘及天帝臣民四輩弟子欲聽如來說
甘露法有異方道士異學婆羅門七人頭鬚
皓白拄杖呻吟來至佛所稽首作禮叉手白
佛言吾等遠人伏承聖化久應歸命道術有

簡今乃得來覲覩聖顏願爲弟子得滅衆苦
佛即聽受悉爲沙門勅七比丘共止一房然
此七人覩見世尊尋得爲道不計無常變易
之法共坐房中思惟世事小語大笑不念成
敗命日促盡不與人期但共戲笑恣意放逸
不念無常爾時世尊起至房中而告之曰卿
等爲道當求度世無爲之道何爲大笑一切
衆生自憑五事何謂爲五一者恃怙年少二
者恃怙端正三者恃怙力勢四者恃怙才器
五者恃怙貴族卿等七人小語大笑恃怙何

等於是世尊即說頌曰

何喜何笑念常熾然深蔽幽冥如不求錠
何喜何笑者爾時世尊告七人曰汝等七人
未在這境亦復不在須陀洹斯陀舍阿那舍
阿羅漢復告比丘我先有教未能盡漏不可
有所恃怙汝等受形未脫結縛蛇^九虺共居成
五盛陰云何於中小語大笑當念此苦永劫
不除方興戲笑以成塵垢苦哉難悟卿等是
也故曰何喜何笑是世尊教勅之言念常熾
然者云何為熾然以無常火而為熾然亦以

苦火而為熾然愁憂苦惱而為熾然又以何
等而見熾然愛欲瞋恚愚癡憍慢嫉妬恚癡
所見熾然故曰念常熾然深蔽幽冥者猶人
夜行不覩顏色生盲無目不見玄黃如此幽
冥蓋不足言所謂大幽冥者無明纏絡遍人
形體無空缺處是謂大冥覆蔽衆生不別善
惡趣要之本不別白黑縛解之要道俗之法
亦復不知善趣惡趣出要滅盡故曰深蔽幽
冥如不求錠者云何為錠所謂智慧之燈以
智慧錠為照何等答曰知結所興以道滅之

分別善趣惡趣出要之本能別白黑縛解之
要道俗之法善能分別善趣惡趣出要滅盡
普曜諸法無不明照而更捨之乃趣冥道故
曰如不求錠

諸有形器散在諸方骨色如鶻斯有何樂
昔佛在舍衛國祇樹給孤獨園爾時有異比
丘日至城外曠野冢間路由他田乃得達過
其主見已便興瞋恚此何道士日此往來不
修道德即問道人汝何乞士在吾田中縱橫
往來乃成人蹤道人報曰吾有鬬訟來求證

人時彼田主宿緣鈎連應蒙得度便逐道人
私匿從行見曠冢間屍骸狼籍胖脹臭爛鳥
獸食噉散落異處或有食噉盡不盡者有似
鳩鵲蛆蟲噉味臭穢難近烏鵲狐狗老鷲鷄
鵲噉死人屍比丘舉手語彼人曰此諸鳥獸
是我證人其人問曰此諸鳥獸可爲證人汝
今比丘與誰共諍比丘報曰心之爲病多諸
漏患我觀此骸分別惡露便還房室還自觀
身從頭至足與彼無異然此心意流馳萬端
追逐幻偽色聲香味細滑之法我今欲戒心